

平塘陶先生詩

平塘陶先生詩序

先儒有言志於道德者功名不足以累其心志於功名者富貴不足以累其心志於富貴而已者則亦無所不至矣古今人品要不出此志於上或得其中志於中未必不流於下爲士者可不知所擇乎嘉定己卯余偕計吏上春官試有日洪撫之士以文會者餘二十人因識平塘陶公蓋同郡而異邑也襟抱軒豁詞氣質直無脂韋繳繞之態心固啟敬已而四士中選君避暑天竺山中不入城市頗從禪客遨遊泉石間餘事吟哦恬不以進取爲意入對廣廷隨問隨答

流出胸臆謂君心有不可已之誠則治道有必至之  
效簡勁的切竟以是擢乙科銓部唱注自謂齒髮垂  
暮不暇須遠戍遂取德安戶曹闕以歸明年之官政  
聲獵獵如日起將終更改辟推幕余試衡陽吏郡人  
寺丞鍾公興爲京西漕爲余言嘗邂逅蕭寺夜語達  
旦知君才必爲世用延譽當路其後入制幕脫選宰  
邑倅巴陵兼郡組民譽如一日會有悼亡哭子之戚  
於是忘情軒冕洗心憂患矣閑居十餘年賦詩飲酒  
蕭然物外靜退之風聞者興起古心江公荆溪吳公  
先後持漕節聘以禮幣俾長湖學君爲彊起士論翕

然晚歲可齋李公薦之

廟堂俾以容筦郡章君掉臂不顧識者益高之方君  
初第時有志當時謂功業可立致小試緒餘蔚有成  
績使稍委蛇其間未必不躡取顯美而知幾勇退脫  
屣功名之會游心道德之場齒宿行尊士有矜式身  
退名立莫得瑕疵此視世之沉酣聲利者相去何啻  
九牛毛哉然則公之吟咏情性蓋有德者之言而非  
嘲風弄月之比矣余幸出榜下辱相知心杏園一別  
良集弗再每爲永慨君之子時中嘗胥會鄉郡手授  
詩藁一編屬子爲之序未酬諾責遽隔今古君之詩

與人俱重固不待予言而傳掛劍之義情不能已因  
君之甥樊法漕夢辰來訪乃序次其本末以授之九  
原可作將有感於斯文

景定壬戌九月己丑同年生玉局散吏李義山序

平塘陶先生詩序

嘉熙庚子秋余校藝旴江竣事歸舟出豫章聞距城  
不三舍有平塘陶公自荆閬賦歸纘戎粟里浩然掩  
關不入城府再期月矣願一見之以藥瑕客時去家  
久亟思歸浣袍袴未遑暇也然心鄉往之越瀉祐壬  
寅秋余以古心先生檄來計幕始至艤舟南浦亭步

聞公爲先生一出領教東湖去亦未久余喜得遂宿  
心謁先生退亟納謁湖公堂挹入語甚款恍然坐我  
魯山道州坐側凡心廢然爲之墮絀嗣茲每會加款  
胸襟灑落衣被湖蓮歲晚公駕舟東歸翼歲古心以  
毀鬲解臺府事余隨牒抗塵夢想清致越十有一年  
而公下世余閩間愴然痛斯人之不再見又越四年  
余以宏齋先生檄留東湖每往蹟想流風何嘗不浩  
嘆欽挹之居數月公嗣子戶曹儼惠然於予出平塘  
詩一編盥捧莊閱如見其人韻蕭散而思平遠有朱  
弦疏越之音三四讀使人作塵外想猶覩對淵明悠

然時也余慨嘆曰詩家者流取數多於麻竹命題發  
興寫松菊詠雲泉十常八九其屬思遣語往往知以  
平淡爲宗然讀之有真能使人意消神解如是編者  
乎彼方乘澆風逐奔濤出捷徑赴炎焰而惟日不足  
也然且強作恬退語欺我巖壑如盧藏用向終南吐  
高語而謂司馬承禎可罔乎哉公四十而仕六十而  
歸中間二十年宦轍所經可言卽言可爲卽爲可止  
卽止可去卽去宦情薄於浮雲世味淡於嚼蠟不待  
掛冠而後知其無戀戀心旣歸十有五年麾符錫命  
絡繹踵門公方且策扶老盼庭柯優游爾休以至乘

原缺



平塘陶先生詩卷一

宋進賢陶夢桂撰

律

五言

青山夾

天宇秋來淡江流急處鳴小風旗脚活晴日鼓聲清  
歲晚冬歸客時危北望情沿江十萬戶流寓若爲生  
次韻張彥謨

滄海張公子秋來會面稀攜詩曉相訪話舊夜忘歸  
德邵吾身潤道行天下肥窮通都莫問一炷篆煙微

送堅太師往雲蓋兼簡隆老

梅月廉纖雨麥秋清潤天幾程雲蓋路一葉石山船  
瓦礫猶能說葫蘆自去纏到時應問我爲道只高眠  
送敝上人遊湖湘

分手仍攜手南昌更武昌細論文暢序重憶贊公房  
衡嶽雲如故曹溪水更香不須論遠近秋盡卻還鄉  
自述

每與溪山對自然懷抱開不愁明日事何用卽時杯  
一任頭如雪孤眠鼻有雷早間巾履潤池上看魚來

謾興

溪山爭獻狀易得小詩成病骨如松瘦清愁似草生  
苦無人比飯喜有弟分羹下及長鬚輩人言似願榮  
次韻同舟諸丈

古岸留雲色晴江老日華捉船人上水撾鼓客還家  
已自身如葉何堪眼更花搖搖強招飲茅店酒旗斜  
送舒用之莖有感

藕塘三畝宅松竹蔭蘭孫有酒曾留客無香可返魂  
親朋惟我老心事與誰論苦淚如縻縷隨風灑墓門  
示次兒柔中出贅

誨汝汝知平家貧廼贅居奉身須節約接物要謙虛

勿以清罇汚而於黃卷疎只須銘此語一任命何如

大兒時中堂成德脩弟喜而賦之因次元韻

有譚名利者耳若了不聞心乎平似水身也懶於雲  
眇眇居人世駸駸過隙曛田園趣歸去風月謾平分  
有子萬事足一堂何足論還欣身有托或謂壽無根  
靜處安吾分超然忘世紛爐薰祝萬壽持用答吾君

七言

余試吏初期六十止今遂初願喜而賦之

小兒無力報明時六十休官早自期今歲纔週花甲  
子此身已在菊東籬行年如許化未化天命而今知

不知休問聖賢千古事從今詩酒是吾師

記初第時贈相士詩

覓得荷衣亦偶然三壬三甲莫虛傳知無皂蓋朱幡  
分奈有清泉白石緣今日爲貧行作吏他時有路卽  
歸田頭顱自斷祇如許但問閑居得幾年

追次前韻

清泉白石故依然俚語當時已浪傳千里歸來尋舊  
約一生鞅掌任前緣身強只欠登山屐老去何須負  
郭田金石舊交半淪謝新松嫩竹是忘年

岳陽樓

朱欄獨倚晚天晴喚起江湖萬里情風撼君山波浩  
蕩雲歸衡嶽月分明飄飄杜老乘槎興杳杳軒皇奏  
樂聲好把天瓢盛此水滌除旱魃作秋成

酌君山遠上人送別

戀戀君山未解維高僧來送贈行詩誰知歸去陶元  
亮又遇當年遠法師蓮社欲留聽說法菊籬那忍負  
歸岐岐疑臨期重約頭陀會記得江干話別時

九日登江湖偉觀矩堂董先生時帥九江慰  
勞甚至

琵琶亭下北風狂浩蕩江天接大荒亟舍扁舟登偉

觀旋呼官酒作重陽故人一見驚頭白寒菊新開滿  
眼黃底用四絃如裂帛異鄉遊覽自悲傷

舟次吳城山

淮蜀荆襄老此生歸與雙眼識吳城樹依神力連雲  
暗水到江西徹底清去掉來帆南北客孤鴻落日古  
今情枯腸尚可搜詩句三老放船鉦一聲

次韻德脩弟

自古賢名隱魏亭老夫底用更專城得閑且看雲來  
往不飲休論酒濁清險阻備嘗知世味消磨不盡是  
詩情西堂不作惠連夢共聽荻簷夜雨聲

望郡城酌舟中諸丈

歸路靈迂三兩程落霞孤鶩近鄉城水連南浦天然  
碧秋入西山雨後清鹿夢已醒諳世事鷗盟猶在見  
交情近來一事君知否耳畔全無鼙鼓聲

次韻德脩弟

一笑相逢在眼前底須尺素付郵傳池塘生草尋殘  
夢風雨連床了宿緣遮暮雪霜侵兩鬢倚雲梨棗出  
丹甌田從今不願重分手糲飯團圞樂滿百年

書懷

明時容我老山林病骨那禁歲月侵破屋僅存容膝



地短榮喚起讀書心三生習氣磨難盡一餉榮華去  
莫尋苦學吟詩終不近信知前輩用工深

自題

短衣匹馬遍關山二十年來一夢間萬里煙塵催我  
老一溪風月伴人閑處心簡淡常常足着意經求事  
事艱亭午厨人多喜色隣翁舉網得魚還

次韻堅太師

明時有分坐空山終日心遊天壤間無欲始安貧裏  
樂是人只得睡時閑離家便憶居家好論事那知任  
事難自恨此身天所相干戈叢裏得生還

次韻友人

只將夢幻視浮生志念俱消豈復增竹杖芒鞋輕勝  
馬布衣蔬飯淡於僧睡魔爲祟勤呼茗病眼羞明懶  
近燈好把金篦輕掠削近來知有阿誰能

次韻汪山園

泉石相干興味長夢魂飛不到錢塘病來弘景難忘  
藥老去淵明不御觴舊館溪山勤檢校新收風月懶  
平章讀書事業依然在一目猶慚不十行

再次韻

急雨聲中夜漏長曉來嫩水漲平塘試扶竹杖穿三

徑自折梅花薦一觴我縱撚鬚難得句君纔開口便  
成章偃旗仆鼓退三舍且遜元戎十乘行

次韻毛切聲

人生自得卽逍遙到底聲名不用高心地一朝收汗  
馬泰山萬仞等秋毫處囊脫穎君非晚爲米折腰余  
憚勞喜得新詩當文選何須痛飲讀離騷

謾興

吟情常得閑情助和氣多爲直氣侵易說難行天下  
事未爲先懶老來心公然排闥清風入悄地窺牕好  
月尋風月無情肯相管塵緣終淺道緣深

寄王良佐

高高林木帶烟霞短短茅簷寄水涯儘有清風疎種  
竹苦無空地密栽花雲停栗里淵明屋月滿剡溪安  
道家會待子猷清興發扁舟一葉着平沙

次韻二首

倦倚欄杆對暮霞展君吟卷喜無涯圓如掌上黃金  
彈清比梅梢白玉花試問山林無我輩却將景物付  
誰家風簷把玩徘徊久煙在平林月在沙

平塘古木帶餘霞清蔭週遭水四涯在世能消幾兩  
屐惱人無奈四時花好隨彩筆題詩句笑入青帘賣

酒家却憶當年杜陵老有誰相伴醉長沙

次韻良佐歇心歌三首

一生受用燕營窠百歲光陰馬駐坡晚境喜無干已  
事故人遠寄歇心歌君開經卷塵緣了我闕山林詩  
料多得句却愁成綺語何如一意向禪那

隨意栽培花幾窠梅坡安穩卽巒坡土尊豈勝茹柴  
酒法曲何如款乃歌着意事無虛事有快行時少坐  
時多閑身散誕休驚去塵世光陰等剎那

鳥窠看了看蜂窠纔上坡來又下坡松竹徑中逢野  
老芰荷香裏唱漁歌歸來不見香風改老去何愁明

月多況有句文供佈施僧來也喚作檀那

寄椿上人

顏童齒豁老書生習氣消除道氣增自止酒來疎酒  
伴閑吟詩去寄詩僧不才癰腫莊周木無盡光明摩  
詰燈解道本來無一物未容盡遜嶺南能

次韻龔子輝

身計平生盡付天歸來環堵更蕭然君於客裏懷新  
緩我愧齋中祇舊氊一見便論千古事定教遲了十  
餘年驚駘強欲追高躅病骨摧頽怕受鞭

讀傳燈錄

公案堆來高似山人人沉着語言間水中掬月徒辛  
苦衣下尋珠只等閑此事不從人世得諸賢枉道法  
門艱千山萬水參禪者行到窮時祇自還

遊永福寺二首

二十餘年不入山重來疑是夢魂間薰爐已冷燈猶  
在經卷纔收磬自閑寂寂禪關人罕到茫茫入世事  
多艱竭來細說無生話穩坐蒲團不忍還

次韻

寺占吾鄉好處山半新半舊屋千間水中蓮似尼清  
淨雨後雲如僧退閑石路教人脩整過芒鞋怕我往

來艱夜深火炬渾無用長是天教月送還

次韻陶明甫

寸質元非紫磨金少時徒有濟時心中年世味諳常  
盡晚節宗門趨向深萬境皆空何所着百年未滿得  
長吟人間俯仰咸塵跡惟有江山不古今

約客

家在青山綠水間柴門雖設亦常關  
稠花浪蕊隨時有樂事賞心從古慳  
世上人多爲物役眼前誰肯掣  
身還君能不負平生約袖有新詩慰病顏

次韻王衡甫



野徑溪橋取次行山青水秀眼增明身居塵外年年  
健心到灰時事事輕文陣揮戈吾退舍詩壇歃血子  
同盟直將修月拿雲手拾得人間句見成

次韻良佐

回也逍遙只寓言參乎三省道真傳明知榮悴何由  
我誰道脩爲亦屬天朝市山林皆寄耳簡編燈火故  
依然窮年矻矻人休訝山宅臞儒便是仙

次弓天錫送胡儒文韻

不論朝市與山林兩鬢難禁白髮侵物外休論天下  
事書中要見古人心老來酒債渾無有公等詩名儘

可尋吟料從來無盡藏江湖萬里水雲深

與弓王二尉談詩二首

從來造物只兒嬉用舍行藏各一時玉兔金烏元去  
速曉猿夜鶴惟歸遲幸然三徑菊如舊且與兩梅仙  
說詩試問釣車茶具外當時誰予伴天隨  
崔羅門巷駐高車靄靄停雲滿眼時惟有故情來得  
得却搜詩句步遲遲北牕不放淵明臥南澗同看子  
厚詩要識吾儕長久處此心如月鎮相隨

良佐留別詩頗悽惋次韻叙間居之樂以釋

之二首

困人天氣晝沉沉飯罷茶甌儘放深笑領故人遊竹  
洞因尋詩句到梅林已教兒去將詩寫又喚孫來把  
酒斟行樂旣知明日少合如吾祖惜分陰

騰騰曉日夕還沉淺淺秋江春又深消息旣知由造  
化憂愁那得到山林已吟有興猶重和未醉開樽任  
滿斟浮利浮名都莫問只將詩酒送光陰

次韻汪子與

生來骨相不如人那更心空似此君一見好書惟恐  
盡每逢佳客怕言分自知原憲貧非病莫問琴張達  
是聞吟罷不知身已老莫教萬里淨無雲

次韻粲上人

飛錫來尋避俗翁不辭劈面受霜風因君髮被詩催  
白知我顏須借酒紅秀谷幾年千里隔空寮今夕一  
燈同恨無日暮碧雲句編入文通雜綬中

同子興賦雪中折帶冰梅

雪裏攀梅冷不勝歸來分插幾空瓶花間亂綴未凋  
玉窗下細看元是冰旋覺煖回還易散只愁凍損獨  
先零詩翁貪看橫斜影未暝呼童急上燈

卽事

桂花香處麝臍破楓葉丹時錦帳開天遣年華隨

去山將野色入簾來  
鑷殘白髮愁無迹  
割盡黃雲酒有材  
不負小園佳景致  
乘閑與客共徘徊

八月十三夜月

人情何待十分圓滿  
目金波已浩然  
明到杜陵頭上  
髮寒侵鄭老客中  
瓊中秋未必似  
今夕好景其如又  
隔年多謝望舒知  
此意冰輪緩碾不  
加鞭

送範之侄謁留守別先生

不待吹噓送上天  
凌雲意氣自飄然  
長江秋色將征旆  
半夜霜威襲客羶  
淝水功名須爾力  
斜川風月了吾年  
師門念舊如相問  
爲道衰頽怕着鞭

酹堅大師

蜀山越嶠倦躋攀，杖驚年掛壁間。駒隙光中驚迅，  
速龍泉山裏占清閑。但存寶藏明珠在，不管石頭行  
路難。香冷磬殘經卷了，倚欄靜數暮鴉還。

極高明樓飲散次韻二首

有景可觀無遠近，新樓真是極高明。水因雨過多新  
進，楓到年來獨老成。萬頃煙波魚得計，一天風月鴈  
能鳴。醉餘客散清愁入，嘹亮漁舟笛數聲。

江練繁纒山脚白，露珠密簇草頭明。一天秋意淒涼  
甚，幾日西風醞造成。新月光中新鴈過，暮雲深處暮

鐘鳴得君吟卷呼兒讀吹竹彈絲無此聲

送胡上人遊浙

大別山頭訪早梅梅邊邂逅笑顏開十年一夢看看  
老萬水千山得得來馬祖話中心卽佛盧能偈裏鏡  
非臺卽今了却此公案便是公門及第回

黃澄伯下第以詩來訪次韻

平塘水外竹三畝古木陰中屋數間天幸諸賢皆大  
用分甘少病比長閑百年世事皆前定一枕清風無  
後艱多謝新詩來慰藉不堪溢美欲封還

題塗季儒愚安堂

而翁吉德怕人知天與良孫一似之自分隨緣栖矮  
室何曾弄巧躡危機人生懷抱祇平易天下道塗皆  
坦夷此語莫書堂上壁客來徒說是和非

送饒守萬仲衡葬次山園韻

塵埃滿面雪蒙頭只合滄洲把釣鉤鄉里故人今日  
少山川英氣一時收絕憐逝者成千古誰念淒其老  
一邱野店相逢聊舉酒潸然苦淚落莖甌

先塋之左得生壙喜而示兒

鼓樓岡上舊墳頭又有山靈獻寢邱萬里歸來生處  
樂一心甘向死前休盡捐世事兼家事但把嬉遊當



宦遊糲飯梨羹而辨得吾衰此外更何求

題竹巖丁直卿鏤冰集

一片好詩如片月半生愁殺鏤冰翁多情誤以苦爲  
樂衆體疑於異却同幾度手抄方刻棗數莖髮在已  
如蓬江湖醉墨爭馳騁誰識巖燈夜夜紅

平塘陶先生詩卷一

平塘陶先生詩卷二

宋進賢陶夢桂撰

絕句

五言

登胡氏樓

胡字敬叔

草際露華白天邊雲浪開好風何處起和月入簾來

次韻

水將羅帶繞山展畫圖開二十年前客身閑又此來

七言

感懷五首

平塘二

記得當年宴杏園  
旁人儘道似神仙  
全家自此廢耕織  
枉費公家多少錢  
憶昔身章兩度新  
庭闈恨不拜雙親  
雖然累贈光泉壤  
還是酬恩未了人

佐岳歸來得自如  
依然服色似芙渠  
兒童癡絕牽衣問  
腰不如何不見魚

心力較衰於少日  
園池差勝似前原  
畦蔬繞舍苔侵徑  
棘刺編籬竹打門

每憶間關離陷穽  
一年剡壁一番新  
雖無毫髮私於己  
豈有涓埃及得人

平塘三首次子輝韻

歸來荒却舊田園手自誅鋤又一番江上清風終耐  
久依然和月到柴門

秋水清明鏡不如含羞照影獨紅渠莫因風冷嫌衣  
破容我傍邊看戲魚

平築三塘共一園箇中宜著老癯仙隨緣妝點非難  
事粗果閑花不值錢

贈神眼相士

邊檄煙塵日漲天天教老病喚歸田從君試問平塘  
水更照衰容得幾年

重次龔子輝平塘韻三首

夢覺歸來涉舊園共尋幽事有梅仙乍穿綠竹教成  
徑莫踏蒼苔破却錢

白髮多時精力少綠樽疎後簡編親本無世上榮華  
分莫作山間懶惰人

家園指擬似淇園惜笋兼存上下番若與此君情分  
薄應無風月到吾門

重九與堅大師登墳庵新閣因憶癸巳歲此  
日同在益昌道中行役之勞遂成一絕

茱萸笑把登高閣菊蕊纔堪薦一觴却憶當年關表

路無花無酒更淒涼

舟次卷雪樓四首

簿書期會不相關老眼如何不得閑景物無端故勾  
引淮山盡處又廬山

踏遍三邊過劒關故山風月幾年閑如今著我中間  
住風月無緣獨占山

生怕老來先告老却於閑處不禁閑不將黃卷遮雙  
眼便捲朱簾看遠山

虎豹從渠守九關不求進步只求閑歸裝幸有新詩  
在一字千金儘買山

懷帥書黃先生余時次萬安先生開閣九江  
檄真底

碧落班中出鎮時紅蓮幕裏我栖遲四年兩地無消  
息好倩西風爲寄詩

書事

有書有史聊遮眼半瓦半茅還是家莫道幽人無受  
用銅瓶獮插木犀花

謾興

圖書叢裏清癯老山水光中瀟灑家除却栽花栽竹  
外更將何事作生涯



同子輝月下觀梅二首

風聲不作寒無力雲翳纔收月有華清興牽人眠不  
得開門共看古梅花  
白髮從來羞月色弊衣那更帶霜華三生結習依然在  
貪看寒梅幾樹花

次友人韻

綠竹漫山元積玉青苔滿地又流錢箇般也怕難消  
受日炷爐薰答上天

贈眼科舒醫士

此老年來醫有靈病眸纔洗便增明教僕還盡讀書

債頭白依然對短檠

老梅

早年鋤月手親栽看到成陰結子來二十餘年如一  
夢歸來五度見花開

推梅

小軒舊名更好

更好軒中幾報春幽人去後化爲薪向來花在孫枝  
上一笑相看似故人

桑

密葉柔條綠更腴幾年培植費工夫牡丹剥費醫治  
力曾有絲毫利益無

柘

老矣能消幾許衣一株休論幾絢原作鈎絲垂楊舞澈  
鶯歌歇且看東風舞柘枝

金燈花

紫磨真金百煉成花神妝點似燈明膽瓶盛取當書  
案白首韓公對短檠

古樟

抱合材堪任棟梁斧斤相引到明堂何如生近幽人  
屋歲晚相看各老蒼

種梅

矮窗元向竹邊開  
竹已森然只欠梅  
新種一株花尙少  
暗香早逐細風來

小桃源

乾坤無處著臞仙  
乞與桃源小洞天  
不用窮源防失路  
桃花盡處便回船

桃

誰從王母覓來栽  
等得花開結子來  
我種數株能幾久  
有花如錦子如盃

李

仙李栽培舊滿門  
歸來僅有一株存  
年年碧實和煙

摘老子未嘗先乞孫

雙楓

山緣何事也窮空  
百里岡巒化作童  
莫道吾廬無認處  
行人遠遠見雙楓

梧桐

妝點山居要碧梧  
向來培植費工夫  
一株隨風成仙去  
留得孫枝乞鳳雛

孤松

傲睨風霜老更臞  
旁邊著我未爲孤  
向來元亮盤桓後  
試問曾逢我輩無

苦行

住近幽人善卜隣  
少陵詩句豈虛文  
平生清苦過於  
我祇合呼爲苦節君

山礬

香遠花繁葉耐冬  
人人道與木犀同  
一般賽得木犀  
過能爲人間報歲豐

拒霜

消磨水上芙蓉了  
岸上難兄正木彊  
遭際東坡一題  
品後來祇合字宜霜

平塘陶先生詩卷二

平塘陶先生詩卷三

附錄

辟書

公自集註後正班改止一到選部餘皆辟置資相別  
公守安陸辟節度推言則曰戶曹三年廉勤匪懈帥  
湖北辟幹辦則曰稟資朴茂持身介廉正直而通勤  
勞不憚計院趙公崇濤渭夔路辟珍州教則曰志慕  
前脩學該時用廉介有守悃愾無華丞相史公制沿  
江辟武昌兼制幹則曰詳練而端嚴明暢而公勤贊  
畫荆蜀聲實俱懋辟帥機則曰廉平自飾勤勞百爲

弟親推排物力之等差高下不由吏手當江防戒嚴之時征調兵夫按籍而取民服其公俱相孟公制京湖辟制機兼岳倅則曰繡厯州縣綽有能聲檄八帥幕檢杭材計歛散得宜史公關省與郡則曰屢厯邊任曾贊邊幙曾任辰州通判今任京湖機兼通判岳州資厯已高通練曉事廉靜愛民足任民社之寄資相李公辟容州則曰學問淹貫操行端方厯任邊陲藹有佳譽頗自收秩作邑再充機幙兼任辰岳二倅資厯既高自應得郡且恬退不出閉門著書今踰十年尤可嘉尙若畀以嶺外一毫必能行其所學



薦狀

公自入官至閒居諸老先生舉令錄者三舉親民者  
五舉正績所知陞陟各二曰資稟端實不以通練則  
黃公伯因舉令錄也曰素稟端實不爲矯飾篤勤職  
業不憚勞苦宣竭心力爲助最多可謂盡瘁公家而  
不知有身者則黃公舉政績也曰篤實不欺朴茂有  
守則黃公舉親民也曰生長儒素學問淵博識艱苦  
務質實有關出納不憚勞悃愾無華足以當之則計  
使鍾公與舉政績也曰質實無華勤勞不懈則鍾公  
舉親民也曰持身雅潔泣事詳明則計使汪公舉令

錄也曰儒學優長吏材強敏則安陸守梁公丙舉合錄也曰稟資朴厚律己清廉職事克勤繁難不避則別公舉親民也曰稟資果毅臨事敏強則安陸守何公應酉舉親民也曰蘊藉深醇操守廉介則盛山守馬公一飛舉親民也曰質而疎通貧而廉介觀其所蘊待欲有施則丞相董公持憲節時舉陞陟也曰質實無華廉有介守賢聲藹著德業可期則倉使趙公宗濤舉陞陟也曰廉正篤實則禮侍徐公鹿卿舉所知也曰廉介有守恬退不競道無苟合義不辭難曩佐蜀閬間關盡瘁繼爲京湖制機值主將移司駐北

軍於岳軍民雜處南北互疑幾至生事郡無主將俾  
攝州麾撫御得宜號令威信壁壘靖肅里閭燕嬉轉  
危機爲安靜今解綬家食安命俟時窮居野處攻苦  
食淡有浩然長往之志甚爲明時惜若此實材難置  
散地畀以一壘使牧御保障以展其材必驗其効則  
待制楊公恢舉所知也

故知容州朝請陶公墓誌銘

朝請郎知汀州軍州兼管勸農事節制本州

屯戍軍馬羅必元撰

嘉熙三年京湖制機兼通判岳州陶公厭薄宦遊思

歸田里書告制置少保節度孟公于公鄂公孟公報  
曰上流宿師正倚君重幸君少留會公夫人陳氏卒  
告歸益力孟公乃檄公就議既至孟公迎謝曰久念  
賢勞今當辟君守所部鼎澧等郡君自擇公辭孟公  
又諭同幙勉留公乃請假歸葬陳夫人孟公許之既  
歸與族親隣里相見欣然喜曰吾不復出矣孟公累  
檄催還司丞相史公督帥至岳州訪知公歸闕尙書  
省與郡不應今四州宣諭李公經略廣西辟知容州  
命下公乃知之亦不赴閑居十五年以寶祐元年六  
月辛未卒於家壽七十四將以明年十月丙申葬鼓

樓岡從祖妣北子時中述公事跡走汀州乞銘予泣  
曰嗚呼吾於吾鄉而見有斯人也今亡矣吾世則不  
復見有斯人也乃叙而銘之公諱夢桂字德芳曾祖  
涇祖斐父彪贈朝散大夫世爲隆興之進賢人公全  
得剛善之性其日用自明自直自強毅自正固義之  
所在褰裳疾趨曰好事其可將與他人做了雖墮機  
穽不悔如其利却顧反走如見所畏登嘉定庚辰進  
士第調德安司戶戍兵過郡以京交湖會博換致閔  
公謂太守曰軍人所執者朝廷命也鋪戶所執者市  
井價也宜從朝廷命守固吝公曰事有權宜願以告

身抵二十萬自與軍人博換守不得已從之人情乃  
安參政大資別公來領郡辟節度推官別公移帥江  
陵辟淮遣又辟幹辨襄閩疑別公位逼陰掇拾欲去  
之先以書招公不往遂與別公俱被劾趙公崇濤漕  
夔路珍州改辟溫湯鹽官朝廷議經理關外四州制  
置使黃公伯自成都移鎮益昌雅善公檄行邊遂厯  
走階成文鳳視勢險易規畫守潔所過郡守將餽送  
並回犒戍卒士皆願爲公用會黃公罷公亦出蜀改  
官知吉州萬安縣丞相史公制置沿江改辟武昌縣  
兼制幹一年辟帥機又辟通判辰州孟公制置京湖

兼知岳州辟制機兼通判孟公還駐鄂州委公行岳  
州事時南北軍民浩穰孟公兄弟各提兵在郡主客  
勢偏重公竝立無所撓統制官二人援蜀回所過爲  
暴公申制司而差官勞之境外二人喜歛兵過俄而  
制司帥劔之紀綱大振然公嘗言仕宦止六十歲至  
是決去不可留矣積官至朝請郎歷任十一而外辟  
者九公議論高亢氣貌嚴冷不能媚悅人人視公矯  
矯如野鶴亦不敢以爵祿牢籠致公故公所居官得  
以行其所知無諸纏繞雖非揣合亦當人心二十年  
間出入江淮荆蜀愛重民力脩明軍政邊臣不問文

武皆赤心與交營伍將校亦加欵接以盡其能其慮遠矣故當艱難之際諸閫簡僚必在選初孟公任鄂州都統兵頗驕公在制幙繩以法不少汰孟公以此知公終始屬心焉遇多事人方商校禍福各擇所便公常慷慨請任其難及其薦賞則歛退不敢當不得已亦歸重同列而自取其薄末年閉門却掃避權勢如避讐怨史公別公位宰執皆絕不通問至於散財與人而自處不可堪之貧則人尤難之使其家有一物之贏餘若疣贅之在身必決絕去乃快始末仕不能自食假貸所得猶與人共既仕賓客有醪醴之奉



而妻子無醯醢之給每誦范文正語曰宗族鄉黨見  
生長幼學壯仕爲助喜何以報之自鄂州歸有俸餘  
盡出而散之期秋成歛粟立社倉以利永久適歲大  
侵公歎曰吾志不遂矣取其券焚之不復問陳夫人  
旣葬遣去女使獨一道童與居使掌衣服書畫久而  
忘其勞鬻用器買祠牒與之亦使去深坐一室羸僮  
蹢躅日汲水濯菖蒲爲供紵衣糗飯全似山林堅苦  
脩行道人門俯清池環以脩竹時挾冊長哦其間自  
號平塘老人而終焉有吟藁數卷藏於家子男三人  
長時中次執中先公十有六年卒次柔中女五人長

適胡文德早卒以次適樊秀發胡洽姚次珩鄧夢錫  
孫男三人季深季泓恩孫公命季泓後執中孫女二  
人余嘗論公得於天者厚又能強忍操之不可奪使  
登顯位處大事仗節守義當不愧於古人惟早退故  
不及大有所立然史丞相當國時松江故吏並列侍  
從使公於此少屈可以得志顧未知其能進退無累  
以合名終如今否也其得失輕重後之君子必有以  
處之矣

銘曰

寥寥吾里西山東 白沙青鞋吾兩翁

水瘦山荒同一窮 我老持麾煙霞中

獨全其歸愧此公

祭故知容州朝請陶公文

龔節推日升撰

嗚呼哀哉

平塘先生四十而仕人以爲遲而先生以爲當時六十而歸人以爲早而先生以爲吾老閒居十有五年人以爲惜而先生以爲我心之所自適先生豈不求異以人哉而人固不能不與先生異者豈特出處之跡而已哉滋味人之所嗜也而淡然若蘊鹽之士去

慾人之所難能也如蕭然而林下之僧逸居之所同  
欲也而安然於茅茨之屋遺子人之常情也而終身  
無生產之營先生豈求異於人哉信道篤而自知名  
所樂者內而不計其外故也當其仕也驅馳邊境難  
易不擇歟厯州縣所至見稱先生不以爲有餘及其  
退也優游泉石賦詩自娛故人天上隻字不通先生  
不以爲不足謂世不我知也則二十年間束笋薦書  
無非公廉勤儉朴實靜淡爲說知者多矣謂世皆我  
知也則十五年間故舊樞要以不省記冑啟一齒僅  
見一二不知者亦多矣知不知繫於人此他人所不

能皆先生所能仕不仕繫乎我此先生所以爲先生  
嗚呼升之不肖何足以知先生抑先生於出處大節  
固以自斷於心久矣此日爲貧行作吏他時有路卽  
歸田此初第時詩也萬里歸來生處樂一心甘向死  
前休此勇退時詩也首尾照應言行相顧先生豈欺  
我哉嗚呼鐘鳴漏盡未悟夜行之非日暮窮途多爲  
身後之計此固不足論而世之假終南爲捷徑煩北  
山之移文心口不一律壯老如兩人遂使相逢盡道  
休官去之句曾不滿納子一笑者其視先生人品爲  
何如嗚呼使先生遲歸十年則官豈止員外貴豈止

五馬然而悠長之味不朽之傳有富貴薰天者所不能及則先生之不求多於造物不取足於其身而有得於身後有遺於子子孫孫者不既豐矣乎溫公作范蜀公傳取其勇決至曰景仁所失甚少所得甚多僕於先生亦云嗚呼古人不得而見矣得見先生斯可矣而先生已矣此僕之所以哭之悲而不能已於辭也若夫侍坐從容訓誨厯厯銘之肺腑死弗叛先生其信之尙歆此一觴

挽故知容州朝請陶公章

西山竹巖丁師正

五首

游宦天西北心隨造物遊春風鄖子國明月岳陽樓  
政出黔黎喜名高夷狄愁案巡邊萬里風雪破貂裘  
嚼得菜根斷詩寒骨更臞愛民心雪白報國鬢霜枯  
仕久衣長破歸來屋亦無全家寄僧舍冰凍折吟鬚  
萬影奔朝市歸山見一人青雲莫相附白雪不生塵  
暖日眠松石涼風岸葛巾依然舊原憲猿鶴伴清貧  
苦硬黃花節霜枝香更清乾坤一龐老今古兩淵明  
白玉難重見孤冰不復清夢中期會面雪涕話平生  
揖坐樓頭夜酒杯生菜盤交情三月暮細雨一燈寒  
談笑響如在賡酬墨未乾死生千古別西日照關干

咸末奉議郎新知復州軍州事危驂二首

今代平塘老前身靖節翁直心行杲日清德照寒空  
樂道簞瓢外歸真軀殼中政應高扁墓百世使聞風  
巴陵三載椽太半並棠陰僕守濂溪訓公推靖獻心  
迨更深夜簣茹納惜時金引領西山路天風淚滿襟  
年家生朝請大夫新改差知吉州徐經孫  
袖有銀毫刺史章先生不是薄淮陽倦遊誰不思三  
徑勇退今惟見一堂講席有功周子學義田無愧范  
公莊忍聞耆舊銘旌舉此語吟成淚數行

里生廸功郎新差贛州贛縣主簿羅一鶚

三首



月旦爭推重邦人得範模官資雖刺史氣味一寒儒  
簡淡根真性清廉律薄夫不知書卓行曾入史編無  
世亦多眞士當於晚節看急流能勇退袖手但旁觀  
凡卉隨春盡孤標耐歲寒始終全所守此事古來難  
昔曾親誨色霜凜更春溫貌古心猶古年尊德亦尊  
頭驚生死隔奈有典型存愁絕飛丹旆憑誰爲返魂  
契生宣教郎新知贛州信豐縣事羅一龍  
古貌如公更古心宦情終淺道情深區區飽煖何曾  
計一字廉稱值萬金

幙府當年舉四馳諸公每恨識之遲長材若肯爲時

用世上何官不何爲

盡說休官靖節賢幾人真箇隱林泉如今却有雲仍  
在牢在平塘十五年

剖竹公符墨未乾先生雅意只青山瀟然紙張梅花  
夢不到清香畫戟間

平生心事辱相知矻矻逢人說頂斯可恨襄陽失龐  
老朔風吹淚送靈輜

鄉姪廸功郎新知贛州萬載縣主簿陳棨

靖節高風去千載至今遺響在平塘洗耳洗心甘綠  
野濯纓濯足付滄浪松間月色詩千首竹裏棋聲酒

幾觴正受全歸無一欠未爲公憾爲時傷

甥廸功郎袁州萬載縣主簿樊夢辰

二首

人物晨星似誰歟硬脊梁高風思靖節流派到平塘  
勇向急流退歸來三徑荒未爲先懶句寄傲益增光  
利慾嗟瀾倒沉淪幾縉紳頽波障流俗砥柱賴斯人  
高節標時望清風濯世塵聖朝公史筆卓行傳名臣  
里生進勇副尉吉州節制司準備差遣易中

行二首

平塘古君子出處一淵明詩句月般好宦情雲樣輕  
從教五馬貴不博幾鷗輕滿目西山恨遙途駐降旌

平塘三

士自

顧予生最後相去又臨川欠識先生面幸親令子賢  
典型端有白衣鉢豈無傳德似君家好清脩一節堅  
甥鄉貢進士胡文舉

孤松挺挺稟高風萬語形容不盡中獨指平塘塘上  
水水之清處儼如公

眷姪大學發解進士危彪

世態紛紛等觸蠻惟公打透利名關八州不作士衡  
夢三徑設爲元亮還苦淡平生安北巷孤高一節照  
西山想應精爽難埋沒只在青松白石間

平塘陶先生詩卷三

南城李

松韻珊校

跋

平塘先生生於南宋值國勢阽危江介倣擾二十年  
出入江淮荆蜀治軍愛民廉能稱最當軸雖傾心於  
先生而竟毅然引退蓋知當時樞要不足與謀久溷  
仕途必有白璧青蠅之玷潔身而退先生早見其微  
矣十五年平塘自晦食貧以終雖薦辟日臨堅臥不  
起詩境冲澹不墜靖節家風編中詩悉皆近體僅存  
數十首大抵老年平塘所作其壯仕所作必多闕佚  
先生仕未大顯宋史無傳平塘詩雖有家刻四庫亦  
未採入此帙乃進賢平塘後裔雍正十二年修補崇

禎元年裔孫陶文章刊本寫刻工整甲寅春購諸冷  
攤適有徵刻南北宋人集之舉得此異常欣慰此中  
機緣殆有神助三卷後附有先生四世孫用和處士  
墓誌等篇乃家刻故事與本集無關削之惟所存辟  
書薦狀祭文挽詩皆宋人著作原編爲第三卷實增  
錄也壬戌春月鄉後學李之鼎振唐謹跋於南昌城  
南世業堂